

Raajanut qaleralinnullu licensit killeqanngitsumik piffissalerlugit pigineqartarnerisa Aalisarneq pillugu inatsisartut inatsisaat nr. 18, 31. oktober 1996-imeersumi § 14 atorlugu, ukiunik tallimanik sioqqutsizumik ilimasaaruteqarnikkut killilernerqartalersinnaanerat aningaasaqarnikkullu kinguneqaatissat ilanngullugit – Naalakkersuisut UKA2015-imi saqqummiussassamik misissueqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Nikolaj Jeremiassen, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Aappassaaneerlugu suliarineqarnera

Aalisarnermut, Piniarnermut Nunalerinermullu Ataatsimiititaliaq sukumiilluinnartumik isumaliutissiissummik suliaqarsimanera pillugu Naalakkersuisut sinnerlugit qujassuteqarfigaara. Pingaartumik ataatsimiititaliap killeqanngitsumik piffissalerlugit pisassat oqaluttuassartaasa tulleriaarlugit nassuiaateqarfigisimanera pillugu qutsavigaara. Ataatsimiititaliap isumaliutissiissummini isummersuutit oqaatigisaat arlalissuit Naalakkersuisut isumaqatigaat.

Aammattaaq Inatsisartunut ilaasortaq Nikolaj Jeremiassen inuiaqatigiinnut pingaaruteqaqisumik aalajangiiffigisassatut siunnersuuteqarsimaneranut qujassuteqarfigaara.

Naluneqanngitsutut siunnersuutip siullermeernerani siunnersuutip akuersissutigineqarnissaa Naalakkersuisut inassutigaat. Tamannalu tunngavigalugu Naalakkersuisut isumaliutissiissut isumaqatigaat ataatsimiititaliallu akuersissuteqarnissamik inassuteqaataa isumaqatigalugu.

Ilanngullugu ilisimatitsissutigisinnaavara aalajangiiffigisassatut siunnersuut akuersissutigineqareerpat periarfissaq siullerpaaq atorlugu Naalakkersuisut aallartitsiniarmata, misissuinermi angusat saqqummiunneqarnissat siunertaralugu. Ataatsimiititaliap inassutigisaatut suliaq ataatsimiititaliaq suleqatigalugu ingerlanneqassaaq.

Naggasiullugu nalunaarutigissavara aalisarnerup nutarterniarneqarnera pillugu (imm. 133) 30. april oqallinnitta kingorna aalisarnermut susassaartut aalisarneq pillugu inatsisip suliarineqarnera pillugu ataatsimeeqatigineqarsimmata. Inuuussutissarsiummik ingerlataqartut kissaatigisimavaat aalisarnermut inatsisissaq pillugu suliami qulaajaalluni misissuinerit arlaqartut suli suliarineqartariaqartut. Inatsisartut suleriaasiat malillugu suliaannik tunniussinissamut piffissarititaasut atuuttut pissutigalugit ukiamut ataatsimiinnissamut ataatsimoortumik nutartikkamik aalisarneq pillugu inatsisissatut siunnersuummik saqqummiussisoqassanngilaq.

Taamatut oqaaseqarlunga siunnersuut Inatsisartunut oqaluuserisassanngorlugu ingerlateqqippara.